

弓箭之類多多益辦佛即機亦設二架凡可以  
資戎事者靡不周具所以壯國威而寒外醜之  
膽也二十日出塢塢即造舟之所亦設祭如  
定櫂之時其間若豎桅若浮水若治繚皆有祭  
行祭禮皆如初靡神不舉靡愛斯牲者

王事孔艱利涉大川祈也四月十八日舟先發於南  
臺南臺距海百餘里大舟畏淺必潮平而后行  
日行數里故先之駕舟民稍用一百四十人有  
奇護送軍用一百人通事引禮醫生識字各色  
匠役亦一百餘人官三員千戶一員百戶二員